

瑜伽師地論


《有心、無心地決擇筆記》

王厚華 編輯

2024.03 版

◎ 綱要層次符號：■ □ ◆ ◇ ★ ☆ ➡ ⇄

◎ 使用 pdf 電子檔閱讀時，請打開標籤，可參閱樹狀目錄綱要。



目錄

有心地決擇.....	1
■ 諸心差別而轉，略由五相.....	1
□ 1 世俗道理.....	1
□ 23 勝義道理建立所依能依.....	1
□ 24 勝義道理建立俱有差別.....	2
□ 5 染淨差別.....	2
無心地決擇.....	3

有心地決擇

攝決擇分中有心地

如是已說非三摩呬多地決擇。有心地決擇，我今當說。

■ 諸心差別而轉，略由五相

當知諸心差別而轉，略由五相。

1 由世俗道理建立故
2 由勝義道理建立故
3 由所依能依建立故
4 由俱有建立故
5 由染淨建立故

1 由世俗道理建立故	
2 由勝義道理建立故	3 由所依能依建立故
	4 由俱有建立故
5 由染淨建立故	

□ 1 世俗道理

云何世俗道理建立？謂依世俗道理建立諸心差別轉義，當知如前意地已說。

□ 23 勝義道理建立所依能依

勝義道理建立差別，我今當說。

云何名為勝義道理建立差別？謂略有二識。

1 阿賴耶識	所依
2 轉識	能依

阿賴耶識是所依，轉識是能依。此復六種，所謂眼識乃至意識。

譬如水浪依止瀑流，或如影像依止明鏡。

如是名依勝義道理，建立所依、能依差別。

復次，此中諸識，皆名心、意、識。

1 若就最勝，阿賴耶識名心。 何以故？ 由此識能集聚一切法種子故，於一切時緣執受境，緣不可知一類器境。
2 末那名意，於一切時執我我所及我慢等，思量為性。
3 餘識名識，謂於境界了別為相。

如是三種，有心位中心、意、意識，於一切時俱有而轉。若眼識等轉識不起。

彼若起時，應知彼增俱有而轉。

如是或時四識俱轉，乃至或時八識俱轉。

又一意識，於一時間分別一境，或二或多、自境他境，故說意識不可思議。

問：若彼末那，於一切時思量為性，相續而轉。如世尊說出世末那，云何建立？

答：名假施設，不必如義。

又對治彼，遠離顛倒正思量故。

即此末那任持意識，令分別轉，是故說為意識所依。

□ 24 勝義道理建立俱有差別

又諸轉識，或於一時一切唯與樂受相應俱有而轉，或於一時亦有苦受，或於一時亦有不苦不樂等受相應俱轉。

阿賴耶識相應受，於一切時唯是不苦不樂，唯是異熟生。

此於一切識流轉時，或樂俱行、或苦俱行、或非苦樂俱行位中，恆相續流，乃至命終無有斷絕。

所餘三受，當知思惟之所引發，非是俱生，時時作意引發現前。彼俱生受極微細故，難可分別。

如是等類，當知是名勝義道理，建立諸識俱有差別。

□ 5 染淨差別

復次，阿賴耶識無有煩惱而共相應。

末那恆與四種任運煩惱相應，於一切時俱起不絕。

謂我我所行薩迦耶見、我慢、我愛、不共無明。

是諸煩惱，與善、不善、無記識俱而不相違，其性唯是隱沒無記，任運而起。

當知諸餘分別所起，隨眾緣力差別而轉。

又與末那相應俱有遍行任運四種煩惱，世間治道尚不能為損伏對治。

何以故？

已離欲者猶現行故，隨所生處，是諸煩惱即此地攝。當知此地已離欲者，此地煩惱現行不絕。

何以故？此諸煩惱，唯阿賴耶識種子所引，於一切時任運而生，非所對治及能對治境界緣力差別轉故。

諸離欲者，世間治道若現在前、若不現前，此諸煩惱現行不絕。

若諸有學已見跡者，出世間道現在前時，此諸煩惱不得現行。從彼出已，還復現行。

善通達故，未永斷故。

若諸無學，此一切種皆不現行。

是諸煩惱，當知唯離非想非非想處欲故，一時頓斷，非如餘惑漸漸而斷。

如是等類，當知是名建立雜染、清淨差別。

於此地中餘決擇文，更不復現。

無心地決擇

攝決擇分中無心地

如是已說有心地決擇。

無心地決擇，我今當說。

問：心不生因，凡有幾種？由幾種因，心不得生？

答：心不生因，略有七種；由此因故，心不得生。

何等為七？

1 緣闕故	云何由緣闕故，心不得生？ 謂內眼處壞，若外色處不現在前； 廣說乃至內意處壞，若外法處不現在前； 爾時由彼所生眼識乃至意識終不得生。如是名為由緣闕故，心不得生。
2 作意闕故	云何作意闕故，心不得生？ 謂雖有內眼處不壞，外色處現前；廣說乃至內意處不壞，外法處現前； 若無能生作意正起，爾時由彼所生眼識乃至意識終不得生。 如是名為作意闕故，心不得生。
3 未得故	云何由未得故，心不得生？ 1 謂如有一，於下欲界思惟羸相，於初靜慮思惟靜相，為欲證得初靜慮故。 若於此道不極作意，若修、若習、若多修習，不善修故，於初靜慮未能證得；由未得故，初靜慮俱心不得生。 2 又如有一，於初靜慮、第二、第三、第四靜慮、空無邊處、識無邊處、無所有處思惟羸相，於第二靜慮乃至非想非非想處思惟靜相，如前廣說。 3 又如有一，遍於一切薩迦耶中思惟苦相，於薩迦耶滅涅槃界思惟靜相；為斷一切薩迦耶故，為欲證得涅槃界故。 若於此道不極作意，若修、若習、若多修習，不善修故，不能盡證一切涅槃；由未證故，於諸結、縛，及與隨眠、隨煩惱、纏永解脫心便不得生。 如是名為由未得故，心不得生。
4 相違故	云何由相違故，心不得生？ 1 謂如有一，觸能隨順樂受諸觸，受樂受時，樂受相應心現在前；爾時苦受、非苦樂受相應之心，以相違故，便不得生。 如是若觸能順苦受、不苦不樂受觸，如前廣說；爾時樂受、非苦樂受，樂受、苦受相應之心，以相違故，便不得生。 2 又如有一，貪纏所纏，貪纏相應心現在前；爾時瞋纏相應之心，以相違故，便不得生。 如是若有瞋纏所纏，廣說乃至爾時貪纏相應之心，以相違故，便不得生。 如是名為由相違故，心不得生。

5 斷故	云何斷故，心不得生？ 謂如有一，由善修習八聖支道故，證得無餘貪欲、瞋恚、愚癡永盡； 彼於爾時，有貪、有瞋、有癡心等隨一心法，諸隨煩惱所染汙心，彼 由已斷、已遍知故，皆不得生。 如是名為由永斷故，心不得生。
6 滅故	云何滅故，心不得生？ 1 謂如有一，生無想定、入無想定、入滅盡定；於其中間經爾所時，由 斷滅故，心不得生。 2 又如有一，於無餘依涅槃界中已般涅槃；彼於爾時，畢竟滅故，心不 得生。 如是名為由滅盡故，心不得生。
7 已生故	云何由已生故，心不得生？ 所謂一切已生之心，於現在生剎那已後，必成滅法。 彼現在時，由已生故，更不可生。 彼若滅已，亦已生故，終不可生。 如是名為由已生故，心不得生。

應知由此七因緣故，心不得生。

與此相違七因緣故，隨其所應，諸心得生。
 謂緣不闕故、作意不闕故、已證得故、不相違故、未斷滅故、未滅盡故、未已生故。
 於此地中餘決擇文，更不復現。

願以此功德，莊嚴佛淨土。 上報四重恩，下濟三途苦。
 若有見聞者，悉發菩提心。 盡此一報身，同生極樂國。